

Vischnaunca da Mustér

Lescha d'agricultura

2019

A. Determinaziuns generalas

- Art. 1 Validitad
2 Intent
3 Dretg da vischinar

B. Determinaziuns specialas

I. Gudidas dallas pastiras

- 4 Diever dalla pastira
5 Scamond da pasculaziun sin territori buc affittau
6 Survigilanza

II. Alp Magriel

- 7 Proprietad e gudida

III. Contribuziuns

- 8 Principis generalis
9 Plaz fiera
10 Pastira

IV. Protecziun da vias, praus e pastiras

- 11 Tschuffergnar vias ed implonts da traffic
12 Puschina e grascha
13 Transit
14 Access per la cultivaziun
15 Schurmetg dalla flora e fauna

V. Mesiras sanitaras e polizialas

- 16 Aviuls
17 Malsognas contagiusas
18 Seivs
19 Deponer ballas da pavel

C. Determinaziuns finalas

- 20 Prescripziuns penalas
21 Mieds legals
22 Vigur

A. Determinaziuns generalas

Art. 1 Validitad

La lescha d'agricultura regla ils fatgs agricols ord vesta communal. Ella completescha las concernentas prescripziuns federalas e cantunalas.

Art. 2 Intent

La lescha vul:

- promover ils interess dall'agricultura;
- gidar a mantener bunas e fermas existenzas purilas;
- francar ina gudida raschuneivla dallas pastiras;
- sustener il manteniment dallas ovras d'interess general.

Art. 3 Dretg da vischinar

¹Ei exista negins cunfins da vischinar denter ils uclauns dalla vischnaunca Disentis/Mustér.

²Las pastiras vegnan fittadas tenor ils suandonts criteris:

- al menaschi ch'ei geograficamein il pli datier dalla pastira affittabla;
- sin fundament dalla surfatscha dalla pastira gia affittada e tenor grondezia dil menaschi recliamain ed en proporziun;
- en cass da plirs interessents per ina pastira vegn tratg la sort.

³La suprastanza communal sa en cass specials fittar las pastiras ad autras instituziuns/organisaziuns sco p.ex. pigl interess turistic.

⁴La suprastanza communal sa definir loghens per bargias da lenna sin pastiras. La surfatscha maximala munta a 15 m² per bargia.

B. Determinaziuns specialas

I. Gudidas dallas pastiras

Art. 4 Diever dalla pastira

¹La suprastanza communal regla l'affittaziun dalla pastira e definescha quei en in contract. Igl incasso succeda tenor dus criteris:

- a) cargada normala (Normalstoss);
- b) ulteriuras pastiras per ara (Allmend).

²Il cussegl da vischnaunca relai il regulativ da taxas.

Art. 5 Scamond da pasculaziun sin territori buc affittau

¹Tutta pasculaziun sin territori buc affittau ei scumandada.

²La pasculaziun digl uaul vala tenor art. 32 dalla lescha cantunala davart igl uaul sco utilizaziun disadvantagesa ed ei da principi scumandada. Ina reglamentaziun davart separaziun d'uaul e pastira elaborada en collaboraziun cun ils organs forestals ei necessaria. Sco basa vala il plan da svilup digl uaul regional. Aschilunsch ch'ina reglamentaziun maunca, resta la pasculaziun illegala e sa vegnir punida.

Art. 6 Survigilanza

Tuts animals che gaudan pastira affittada en vischnaunca ston esser sut survigilanza ni ch'ei ston vegnir mess en claus.

II. Alp Magriel**Art. 7 Proprietad e gudida**

L'alp Magriel ei proprietad communal. L'administraziun e l'affittaziun vegn reglada dalla suprastanza communal.

III. Contribuziuns**Art. 8 Principis generals**

La vischnaunca promova la cultivaziun dallas pastiras sco era l'arrundaziun da terren agricol e dallas alps cun conceder contribuziuns:

- a) per schubergiar e mantener las pastiras;
- b) per ereger e mantener vias funsilas;
- c) per sanar e megliar alps en possess da corporaziuns e privats. Contribuziuns communalas san vegnir concedidas mo sche Confederaziun e Cantun separticipeschan alla subvenziun;
- d) la vischnaunca sa pagar in daner da siet per eliminar animals nuscheivels.

Art. 9 Plaz fiera

La vischnaunca metta a disposiziun il terren pil plaz fiera e per las exposiziuns d'animals.

Art. 10 Pastira

La surfatscha dalla pastira existenta ei da mantener.

IV. Protecziun da vias, praus e pastiras**Art. 11 Tschuffergnar vias ed implonts da traffic**

¹Igl ei d'evitar scadina tschuffergnada da vias ed implonts da traffic.

²Tschuffergnadas da vias ston vegnir schubergiadadas ladinamein entras il caschunader. Cass cuntrari dat la vischnaunca las incaricas corrispudentas. Ils cuosts vegnan adossai al caschunader.

Art. 12 Puschina e grascha

¹Tier il metter puschna e grascha ston las leschas ed ordinaziuns surordinadas vegnir observadas.

²Igl ei da prender il dueivel risguard sin igl interess general.

Art. 13 Transit

¹Tut transitar funs senza dretg e necessitad, a pei ni cun menadiras, sco era il periclitar terren cun deviar aua sin terren jester, ei scumandau.

²La suprastonza communal procura che la pastira vegni buca strapazzada e donnegiada entras campar e parcar.

Art. 14 Access per la cultivaziun

¹Igl access per la cultivaziun agricola (praus, aclas e mises) sco era il trapassar cun animals, ha mintga proprietari ni affittader da tolerar, denton mo sche la pusseivladad sur agen terren ei buca dada. Il cultivader sto vegnir informaus ordavon.

²Quei vala era per la raccolta da lenna, la quala ha da succeder dil temps da minimala vegetaziun.

³Eventuals donns cumprovabels entras far diever digl access ein da refar ni d'indemnisar.

⁴Quels dretgs d'access pil diever agricol valan era lu, sch'els ein buca impurtai el register funsil sco servitud.

Art. 15 Schurmetg dalla flora e fauna

¹Il schurmetg dalla flora e fauna sedrezza tenor las prescripziuns cantunalas e federalas.

²La suprastonza communal sa prender disposiziuns specialas per la protecziun dils bulius.

V. Mesiras sanitaras e polizialas**Art. 16 Aviuls**

¹Viandar cun pievels ei lubiu da tut temps sch'ils pievels ein libers d'epidemias. Apiculturs ein obligai da setener vid las ordinaziuns cantunalas digl uffeci per la segirtad da victualias e per la sanadad dils animals dil cantun Grischun sco era da prender il duiu risguard sin la razza locala.

²Edifecis mobils d'apicultura drovan ina lubientscha dil possessur da terren ed ina lubientscha communal per postar e dislocar en vischnaunca.

³Per plazzar stabiliments d'apicultura ei da risguardar ina distanza minimala da 500 m en lingia directa denter ils singuls stabiliments d'apicultura.

⁴Per postar stabiliments d'apicultura agl ur da vias ni sendas basegna ei ina distanza minimala da 10 m.

Art. 17 Malsognas contagiusas

Tuts animals ston vegnir teni e tractai da tut temps tenor las prescripziuns cantunalas.

Art. 18 Seivs

¹Suenter la finiziun dalla pasculaziun ston tuttas seivs provisorias vegnir allontanadas. Seivs da garter da plastic "Flexinetz" astgan vegnir montadas treis dis avon il diever da pasculaziun e ston vegnir demontadas treis dis suenter la pasculaziun.

²Las seivs ein d'ereger aschia che quellas caschunan negins donns vid fauna e flora. En special eis ei scumandau da montar isolaturs ni auters indrezs per fixar seivs vid plontas che fuorman igl ur digl uaul.

³Per liung da vias e sendas da viandar marcadas ein las seivs d'ereger aschia che viandonts ed il traffic vegnan buca periclitai. Sche la seiv traversa ina senda marcada ni via eis ei d'ereger ina purteglia. Il tip dalla purteglia sto corrispunder als basegns dils utilisaders ed allas recumandaziuns dallas organisaziuns dil fatg.

Art. 19 Deponer ballas da pavel

¹Ballas da pavel ein da deponer sper in baghetg dil menaschi ed aschia ch'ellas caschunan negin prighel per la publicitad.

²Las ballas e las restonzas da pavel ein da preservar dalla selvaschina.

C. Determinaziuns finalas

Art. 20 Prescripziuns penelas

Surpassaments encunter quella lescha vegnan puni entras la suprastonza communal cun castitgs entochen frs. 5'000.--. Tier surpassaments sa la suprastonza communal pretender ch'il caschunader remetti il fatg el stan primar.

Art. 21 Mieds legals

Encunter decisiuns e disposiziuns dalla suprastonza communal san ins recuorer enteifer 30 dis suenter la comunicaziun a scret alla Dertgira administrativa dil cantun Grischun.

Art. 22 Vigur

Questa lescha ei vegnida approvada dil cussegl da vischnaunca ils 29 da mars 2019 e passa retroactivamein en vigur cugl 1. da schaner 2019. Ella remplazza tuttas prescripziuns anteriuras e che stattan en cuntradicziun cun questa lescha, en special la lescha d'agricultura per la vischnaunca Disentis/Mustér dils 12 da fevrer 2006.

Per la vischnaunca da Disentis/Mustér

Il president communal:

Il canzlist communal:

Robert Cajacob

Andri Hendry